

driczenhundirt ior dor noch yn dem sebende vnd nunczegistin ior an dem montage noch vnsirs herren hymmelfart.

Vnde wir Johannes techand vnd gancz capitil czum Misin bekennen, das alle obingeschrebinne kouffe vnde redde mit vnsirm rote wissin vnd willen geschen sint, des czu bekentnisse habe wir vnsirs capitils ingesigil ouch an desin briff wissentlich losen hengin.

Nach dem Liber Rudolff episc. Misn. fol. 47^b im Stiftsarchiv zu Meissen.

No. 745. 1397. 25. Juli.

Peter Strossman Bürger zu Meissen eignet dem Capitel einen Weingarten zu Zitzschewig zu seinem, seiner Frau und zweier Töchter Jahrgedächtniss.

Ich Petir Strossman burger czu Misne bekenne offintlich in dissem briffe vor mich vnd alle myne erbin vnd erbnemen vnd thu kunt allen, dy en sehin adir hören lesin, daz ich mit wolbedochtem muthe vnd gutem vorrate myner frunde eynen wingarten gelegin czu Czuczkwicz, den ich gekouft hatte wedir Hanse Kundigen vnd den ich czu lehen hatte von myne herren dem bisschoffe czu Misne, czu eyne rechtin selegerethe gegeben habe den ersamen herren . . techande vnd capittle der kirchen czu Misne vnd vor myne herren dem bisschoffe en den williclich ufgelaßen habe, vnd der bisschof en den gelegin vnd gefryet hat ane alle ansprache vnd hindernis. Besundern habin mir dy vorgnantin herren techand vnd capittil czu Mißen sulche gunst vnd fruntschaft bewiset, daz sy den vorgnanten wyngarten mir, Elizabeth myner elichen frawen, Margarethen vnd Dorothean mynen tochteren mit allen synen fryheiten, burden vnd czugehorungen habin gelegin vnd gegeben czu alle vnsir lieben genczlich czu besiezen, in sulchir wyse vnd mit sulchir vndirscheit, daz wenne ich vorgnantir Petir vnd Elizabeth myne wirtynne von disser werlde scheiden mit dem tode, so sal man vns in dem thume begraben. Ouch habe ich mich megnantir Petir dez vor den vorgnanten herren vorwillekort, ab myne wirtynne ehr vs disser werlde scheidet, wenne ich, so sal ich vnd wil ere iargeczit in der kirchen czu Misne ierlich laßen begen mit vigilien vnd selemessen von mynen pfennyngen, iczlichem thumherren czwene groschen, vicarien vnd cappellan czu eyne groschen czu gebin, alz das gewonheit ist in der kirchen. Gebote abir got ehr öbir mich, daz got schicke nach synen gnaden, so sal dy vorgeschrebin Elizabeth myne wirtynne ouch von erre habe vnd pfennyngen myne iargeczit ierlich laßin begen in der megnantin kirchen, in allir wyse alz obin stet geschrebin, vnd wenne wir beyde vorscheiden, so sollen Margaretha vnd Dorothea vnsir tochtere ouch vnsir iargeczit uf eynen tag mit eynandir ierlich laßen begen in sulchir wise, alz oben ist geschrebin, vnd störbe myner tochtere eyne, so sal is dy andere thun ane wedirsprechen. Ouch wenne wir alle viere, beyde eldern vnd tochtere vorscheiden, so sal denne der vorgeschrebin wyngarte mit alle syner czugehörunge an der vorgnanten kirchen vnd capittils czu Mißen nucz vnd frommen geuallen vnd ansterben ane alle enpferrunge vnd ansprache myner erbin, vnd so sollen denne dy dickegnantin herren techand vnd capittil czu Misne